

Broj predmeta: 01-05-04300-2016
Broj akta: 05EN-001
Gračanica, 30.12.2016.. godine

Z A P I S N I K
SA KONSTITUIRAJUĆE SJEDNICE OPĆINSKOG VIJEĆA
G R A Č A N I C A

Održane dana 01. 12. 2016. godine u sali za sjednice nove zgrade Općine Gračanica sa početkom u 14,00 sati.

Početu sjednice prisustvovalo je 29 novoizabranih članova Općinskog vijeća Gračanica. Odsutan je bio Pjanić Safet.

Sjednicu je otvorio i istom predsjedavao Edin Ibrišević, predsjedavajući Općinskog vijeća Gračanica zajedno sa zamjenikom Seadom Gazibegovićem i sekretarom Tukulj Dženanom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i Općinski načelnik Nusret Helić, Općinski pravobranilac Jasminka Imširović, šefovi službi za upravu: Aida Hodžić, Zijad Dedić i Mustafa Bajić, Alisa Begović savjetnik načelnika za odnose sa javnošću, Hasan Fehratović ministar u Vladi Tuzlanskog kantona, poslanik u Skupštini Tuzlanskog kantona Mirza Omerdić, obespravljene radnice "Fortuna" d.d. Gračanica, navijači i drugi građani, udruženja, te predstavnici sredstava informisanja.

Edin Ibrišević, predsjedavajući Općinskog vijeća iznio je slijedeće:

"Kao što smo predvidjeli, mi ćemo danas krenuti prvo sa svečanim uručenjem certifikata vijećnicima, a potom će svi novoizabrani vijećnici položiti zakletvu, da će raditi u skladu sa Statutom i Poslovníkom Općine Gračanica. Ja ću krenuti po redu".

Predsjedavajući Vijeća je nastavio pozivajući jednog po jednog vijećnika i uručio certifikate. Novi saziv Općinskog vijeća Gračanica čine slijedeći vijećnici:

Krajinović Nihad, Sulejmanović Osman, Topčagić Mirzet, Hasić Ibrahim, Smajlović Vahidin, Bajrić Vahid, Hadžić Mirsad, Milkić Demir, Šakušić Ahmet, Gadžić Rahim, Puškar Hasan, Devedžić Almedin, Pjanić Safet, Ahmetović Halid, Alihodžić Nermina, Dizdarević Kemal, Džebo Senahid, Hadžić Nejra, Jukan Džemal, Dedić Dino, Šehić Edin, Čamdžić Mirsad, Nišić Ismet, Trepanić Mirela, Ibrišević Edin, Ibrišević Alen, Mešić Fadil, Aljić Adem, Avdić Arnes i Mujić Alen.

Nakon uručenja certifikata svi prisutni vijećnici su dali svečanu izjavu i potpisali je, a ona glasi:

„Obavezujem se da ću povjerenu dužnost vijećnika obavljati savjesno i odgovorno, da ću se pridržavati Ustava, Zakona, Statuta Općine Gračanica i drugih akata ovog Vijeća, da ću se zalagati za zaštitu i unapređenje ljudskih prava i sloboda, ravnopravnost građana i naroda i razvoj demokratije u najboljem javnom interesu svih građana općine Gračanica, te da ću predano obavljati povjerene zadatke u cilju razvoja napretka općine Gračanica, Tuzlanskog kantona, Federacije Bosne i Hercegovine i Države Bosne i Hercegovine“.

Općinskom vijeću se obratio Općinski načelnik Nusret Helić:

“Koristim priliku da čestitam izabranim Općinskim vijećnicima, sa nadom da ćemo u narednom ovom periodu, zajednički, svako iz svoje nadležnosti raditi u interesu svih građana. Što se tiče načelnika i ekipe i službi koje će pripremati sve za Općinsko vijeće, budite uvjereni, da ćemo biti dosledni u provođenju zakona, provođenju odluka i politike koja se dogovori u Općinskom vijeću. I nadam se da ćemo raditi u skladu sa principima lokalne samouprave, gdje je rečeno da Općinsko vijeće i Općinski načelnik trebaju saradivati u cilju provođenja Općinske politike i u interesu svih građana. Evo još jednom čestitam i svako dobro želim”.

Edin Ibrišević:

“Za današnju konstituirajuću sjednicu prema Odluci Kolegija predlažem slijedeći dnevni red:

1. IZBOR ČLANOVA KOMISIJE ZA IZBOR I IMENOVANJE.
2. IZBOR PREDSEDAVAJUĆEG OPĆINSKOG VIJEĆA.
3. IZBOR ZAMJENIKA PREDSEDAVAJUĆEG OPĆINSKOG VIJEĆA GRAČANICA.

Nakon otvaranja rasprave o predloženom dnevnom redu za diskusiju se javio Puškar Hasan:

„Ja u ime Komisije za izbor i imenovanje, predlažem proširenje dnevnog reda i da se kao tačka dnevnog reda uvrsti Odluka o pokretanju procedure izrade izmjene Statuta Općine Gračanica. A pravni osnov za pokretanje te Odluke je izmjena člana 29 koji glasi: „Predsjedavajući Općinskog vijeća svoju dužnost obavlja profesionalno, a zamjenik predsjedavajućeg svoju dužnost obavlja na volonterskoj osnovi. Znači u toku javne rasprave bio bi prijedlog da se pokrene procedura, da se član 29 izmijeni i glasi:

„Predsjedavajući Općinskog vijeća i njegov zamjenik svoju dužnost obavlja na volonterskoj osnovi“.

Znači predlažem da se ide u proceduru izmjene kao i nekih drugih izmjena i dopuna i da ova Odluka bude kao zadnja tačka ovog dnevnog reda“.

Čamdžić Mirsad:

„Kolega Puškar je rekao ono što sam i ja htio, evo kao vijećnik Naše stranke da predložim i da napravimo možda i mali pomak u odnosu na ovo.

Pokrenuta je inicijativa za izmjenu člana 29 i slažem se sa ovim da predsjedavajući Vijeća svoju dužnost obavlja na volonterskoj osnovi kao i zamjenik. S obzirom da se radi o složenoj stvari, da znamo kakve su procedure, ja sam ovdje uradio prijedlog Odluke o izmjenama i dopunama Statuta Općine Gračanica. On je iskopiran u 35 primjeraka, znači dostatno svakom vijećniku. Smatram da je prijedlog odlična polazna osnova, o kom možemo razgovarati i da možemo usvojiti Odluku o izmjenama i dopunama Statuta. Stavio sam u član 1 Općinsko vijeće Gračanica donosi odluku o izmjenama i dopunama člana 29. Statuta Općine Gračanica.

Hasan Puškar je intervenisao, rekavši da se raspravlja o dnevnom redu, a Čamdžić je nastavio.

Slažem se potpuno s vama predsjedniče komisije i ja sam za to da se uvrsti ta tačka na dnevni red. Da bi ona bila potpunija ja predlažem Stručnoj službi da podijeli ove Odluke i da istu vidite, jer nemamo ništa napismeno urađeno za ovaj prijedlog. Kako nebi smo čekali, naredni mjesec dana“.

Krajinović Nihad:

„Ja ne želim, dakle ništa da dodajem vezano za dnevni red, jer ovdje razgovaramo o dnevnom redu, samo želim da kažem da se klub SDP-a slaže sa prijedlogom komisije, a to slaganje potvrđujemo time što smo mi inicijativu izmjene Statuta već dostavili ranije Stručnoj službi Općinskog vijeća potpisano od strane svih vijećnika SDP-a“.

Puškar Hasan:

„Znači, da nebi bilo politikanstva, mi smo se na Komisiji dogovorili, jer su bili predstavnici svih političkih partija koje se nalaze u Općinskom vijeću, da bude da Komisija predloži dopunu dnevnog reda. A tamo su bile samo dvije inicijative prema službi Općinskog vijeća i to od SDA i SDP. Znači samo su te dvije inicijative protokolisane i nalaze se ovdje. Pa da nebi bilo ni SDA ni SDP ni neko drugi, nego Komisija pokreće inicijativu, znači predstavnici svih političkih partija su to predložili. Predlažem predsjedavajući da se prijedlog da na glasanje i da idemo raditi dalje“.

Čamdžić Mirsad:

„Ja se slažem sa ovim da uvrstimo kao tačku dnevnog reda. Naša stranka je jedan od pokretača, naravno nikakve politike tu nema. I u najboljoj namjeri, napravljen je prijedlog Odluke koju bi želio da Stručna služba podijeli vijećnicima, kako bi smo imali ukoliko dođe do usvajanja dopune dnevnog reda, polaznu osnovu o čemu ćemo govoriti. Znači imamo prijedlog Odluke o izmjeni i dopuni Statuta Općine Gračanica i da napravimo pauzu od deset minuta kako bi se upoznali svi s tim i da možemo po tome raditi. Ništa više“.

Edin Ibrišević, predsjedavajući Vijeća je naglasio: „Da prvo treba donijeti Vijeće Odluku da se uđe u izmjene Statuta i taj nacrt ide na narednoj sjednici. Poslije nacrtu i javne rasprave ide prijedlog na usvajanje. Takva je procedura“.

Gadžić Rahim:

„Klub SDA nije želio da izlazi za govornicu, mi smo potpisali inicijativu i dostavili u Stručnu službu. Mi danas nećemo raspravljati o Statutu, nego treba da donesemo odluku da idemo u izmjene Statuta i radni materijal nam treba u narednom periodu, ne na današnjoj sjednici. Procedura piše u Statutu i Poslovniku, tako da se ne ide u dalju raspravu i da sjednica krene“.

Predsjedavajući Općinskog vijeća Edin Ibrišević je definisao:

„Da tačka 4. Dnevnog reda bude Odluka o pokretanju izmjena Statuta u pogledu člana 29, a na narednoj sjednici imat ćemo ovo što je kolega Čamdžić predlagao, to jest imat ćemo nacrt jedne takve odluke, koju ćemo staviti u javnu raspravu i onda nakon javne rasprave dati prijedlog Odluke na usvajanje. Znači kao četvrta tačka dnevnog reda je pokretanje odnosno Odluka o pristupanju. Za današnju konstituirajuću sjednicu predlažem slijedeći dnevni red:

1. IZBOR ČLANOVA KOMISIJE ZA IZBOR I IMENOVANJE.
2. IZBOR PREDSEDVAJUĆEG OPĆINSKOG VIJEĆA.
3. IZBOR ZAMJENIKA PREDSEDVAJUĆEG OPĆINSKOG VIJEĆA.
4. ODLUKA O PRISTUPANJU IZMJENAMA I DOPUNAMA STATUTA OPĆINE GRAČANICA.

Dnevni red je dat na izjašnjavanje i isti je usvojen jednoglasno.

Odmah se prešlo na rad po dnevnom redu.

TAČKA 1.

IZBOR ČLANOVA KOMISIJE ZA IZBOR I IMENOVANJE

Prijedlog rješenja o izboru članova Komisije za izbor i imenovanje usvojen je jednoglasno sa 29 glasova „ZA“.

TAČKA 2.

IZBOR PREDSEDAVAJUĆEG OPĆINSKOG VIJEĆA

Edin Ibrišević, predsjedavajući Općinskog vijeća:

„Prije nego što pređemo na drugu tačku dnevnog reda, izbor predsjedavajućeg Općinskog vijeća, iskoristio bih priliku da se zahvalim svim kolegama vijećnicima, sa kojima sam saradivao u narednom periodu, u proteklom periodu. Nadam se da ću u narednom periodu dobro saradivati sa novoizabranim kolegama.

Takođe, zahvaljujem se Općinskom načelniku, šefovima službi i svim ostalim sa kojima sam imao korektnu i da kažem dobru saradnju. Hvala vam, a sad pozivam predsjednika Komisije za izbor i imenovanje, da nam se obrati“.

Hasan Puškar:

„Komisija za izbor i imenovanja je zasjedala dva puta i od svih političkih stranaka zatražila prijedloge kandidata za predsjedavajućeg Općinskog vijeća Gračanica.

U prvim prijedlozima je bilo pet kandidata : Gadžić Rahim prijedlog SDA, Ibrišević Edin prijedlog SDU-BOSS, Krajinović Nihad prijedlog SDP-a, Jukan Džemal prijedlog stranke za BiH i Demir Milkić prijedlog Naše stranke. Nakon toga tri kandidata do održavanja sjednice pismeno su odustala, a Komisija je dala jednu izjavu da kandidati potpišu, svi koji pristanu da idu u proceduru za izbor i glasi ovako: Ja taj i taj izjavljujem da ću ukoliko budem izabran za predsjedavajućeg Općinskog vijeća Gračanica, dužnost ću obavljati na volonterskoj osnovi do izmjene Statuta Općine Gračanica kojim se inicira promjena člana Statuta koji reguliše način obavljanja te dužnosti. Znači pošto su ostala dva kandidata za predsjedavajućeg, oba kandidata Gadžić Rahim i Krajinović Nihad su potpisali izjave da će do izmjene Statuta svoj posao obavljati volonterski. Predlažem da formiramo Komisiju u sastavu dva vijećnika i sekretar Vijeća da obave proceduru izbora“.

Edin Ibrišević:

„Napomenut ću samo da se izbor predsjedavajućeg vrši tajno osim u slučaju da se Vijeće izjasni da to bude javno“.

Puškar Hasan:

„Znači po Statutu izbor se vrši tajno glasanjem osim ako Vijeće ne izglasa da to bude javno. Pošto su dva kandidata, ja predlažem da se glasa tajno u skladu sa Statutom.

Čamdžić Mirsad:

„Ovako samo da iskoristim repliku. Naša stranka je predložila Demira Milkića iz SDP-a za predsjedavajućeg Općinskog vijeća. Vi ste evo saopštili da su tri kandidata odustala. Tu ta tri kandidata sjede, njihova šutnja znači da se slažu s tom Odlukom, da su odustali i mislim da nema potrebe da oni izlaze i da se javno očituju o tome. Ovo zbog javnosti želim da kažem, da smo mi predložili Demira Milkića za predsjedavajućeg, a Mirelu Trepanić za zamjenika računajući, da ćemo ovo što je nametnuto oko izbora predsjedavajućeg u cijeloj političkoj trgovini konkretno pomoći SDP-u da ima svog kandidata. Mi smo predložili najmlađeg kandidata u BiH iako nismo u koaliciji parlamentarne većine sa SDP-om, smatrajući da bi to

bila prva vijest u BiH. Da bi time poslali jednu simboličnu poruku promjene u BiH. Nažalost kandidat je odustao i ja moram reći da smo mi razočarani time i da ćemo mi u ovom slučaju izbora predsjedavajućeg ukoliko bude javno ili tajno glasanje, biti uzdržani. Dakle, tri vijećnika Naše stranke, a možda i još neki bit će uzdržani“.

Predsjedavajući Vijeća je prenio članovima Vijeća da će radnice „Fortune“ d.o.o. podijeliti papire nekim članovima Vijeća, što su i učinili.

Krajinović Nihad:

„Žao mi je što smo i na prvoj konstituirajućoj sjednici krenuli sa politikanstvom, ali evo samo kolegi iz Naše stranke da se zahvalim što podržavaju rad SDP-a u Gračanici i kažem da ukoliko su i njihove želje bile da predsjedavajući radi na volonterskoj osnovi i da radi za građane općine Gračanica takođe su mogli tražiti podršku drugih stranaka koje participiraju u ovom sazivu Vijeća i predložiti svog kandidata i time pokazati dobru volju i želju da imaju i oni predsjedavajućeg. Sve je moguće danas i da taj predsjedavajući radi na volonterskoj osnovi“.

Radnice „Fortune“ d.o.o. su napustile salu za sjednicu.

Čamdžić Mirsad:

„Želim sada da ovo kažem radi javnosti, da nebi bilo neke zabune nakon ovog istupa kolege Krajinovića. Naša stranka je obavila samo jedan razgovor sa SDP-om i tada smo rekli da ćemo podržati kandidata SDP-a. Mi smo to učinili, odmah isto večer kad je Naša stranka donijela Odluku da podržava Demira Milkića i predlaže ga za predsjedavajućeg obavijestili smo pregovarački tim SDP-a. U ličnim kontaktima smo u tri navrata obavještavali i kazali slijedeće. Ukoliko SDP želi da predloži Nihada Krajinovića, mi ćemo povući svoju kandidaturu za gospodina Demira Milkića, kako nebi smo pravili ovu vrstu zabune. Zato što su naše namjere bile iskrene i zato što smo htjeli poslati poruku iz Gračanice da najmlađi vijećnik može obavljati tu funkciju. Mi nikada nismo od SDP-a dobili nikakav odgovor, naprotiv, cijelo vrijeme su trajale trgovine. Bilo je pet, pa četiri, pa dva, dok se na kraju nije svelo na ovo, da kandidati ostanu iz SDP-a i SDA. Mi smo to vidjeli i mi ne želimo, nakon svega učestvovati na ovaj način u davanju podrške ovoj kompaniji za predsjedavajućeg Općinskog vijeća. Dakle, naša želja je bila ponuda da najmlađi kandidat iz SDP-a bude. Mi, da smo imali ikakvu komunikaciju i da SDP nije htio tako da se ponaša i da nas bar jednom neko nazvao, sigurno bi dobili drugo rješenje. Mi smo osjetili jednu vrstu bahatosti s te strane, došlo je do ovakve situacije i sasvim je u ovom odnosu legitimno pravo jedne političke stranke da od tri opcije izabere jednu koju želi. Na glasačkom listiću postoje opcije „ZA“, „PROTIV“ i „SUZDRŽAN“. Rekao sam Naša stranka će u ovim nastalim okolnostima, mi smo za Milkića imali obezbijedenih 16 ruku, da su htjeli da to prihvate gospodin Milkić bi bio sada predsjedavajući. Mi se sa ovom sadašnjom konstatacijom ne slažemo i mi imamo sasvim legitimno pravo, da budemo suzdržani kod ove tačke, bez obzira dali je tajno ili javno glasanje“.

Krajinović Nihad:

„Dobro smo počeli, žao mi je zbog ovih novih kolega koji se prvi put nalaze u sazivu Vijeća. Nemojte se uplašiti ovo je ovako stalno. Hoću samo radi, kako kolega Čamdžić kaže, radi javnosti kažem i ovo. Naša stranka je pri prvom pozivu i susretu i razgovoru eksplicite, uprkos tome što zagovaraju ujedinjenje ljevice, mi sa SDP-om u Gračanici ne idemo. Eksplicite, sa SDP-om u Gračanici, ne idemo. A onda su naravno, koristeći političke igre, doveli u nezgodan položaj našeg mladog kolegu vijećnika Demira Milkića, time što su ga oni predložili kao kandidata za predsjedavajućeg“.

Šehić Edin:

„Malo me je kolega Nihad prozvao kao novog u ovom polju i molio bih da se vratimo na ovo o čemu raspravljamo. Ja sam samo htio predsjedniku Komisije za izbor i imenovanje, obzirom da je potegnuo inicijativu koju su potpisali ovi koji su ostali, da budemo ipak legalisti. Statut jasno govori da je predsjedavajući Općinskog vijeća profesionalno lice, sve dok to ne izmijenimo. On može ovdje javno reći gdje će tu platu dati. Imamo dosta socijalne kategorije. Ali mislim da to trebamo ispoštovati i da ta sredstva imaju javnu namjenu gdje su otišla. Dakle, može se sa tim sredstvima neko pomoći, ali nemojte da sada idemo, kao na nekoj volonterskoj osnovi, a u suštini moramo ispoštovati Statut i Zakon. Dakle, sve dok se ne usvoje izmjene Statuta, mislim da mi moramo poštovati to, a ako se odriču tih sredstava evo neka javno kažu, ako imaju da već negdje nekom pomognu, ili mogu na narednoj sjednici“.

Puškar Hasan:

„Upravo tako, sredstva su predviđena, da ostanu u budžetu i bit će i znat će se kud će otići ta sredstva. Ali nije samo u pitanju naš Statut i Zakon o radu, ne možeš biti na dva mjesta i raditi. Zato i idemo da što prije i urgentno izmijenimo Statut. Zato smo i pokrenuli odmah inicijativu i Statut mi možemo izmijeniti i u decembru i to ne samo član 29. Ima tu mnogih manjkavosti. A sad bih vas zamolio da pristupimo glasanju i da završimo ovu ceremoniju“.

Gadžić Rahim:

„Gospodine predsjedavajući ja sam ovdje imao osjećaj da smo došli na pregovarački tim pa se ovdje iznose stavovi. Molim vas da sjednicu usmjerimo na dnevni red kojeg smo usvojili za današnju sjednicu. Mi kao stranka, smo predložili kandidata i nismo ulazili u pregovore ni s jednom političkom strankom. Smatramo da trebamo imati svog kandidata za predsjedavajućeg Općinskog vijeća Gračanica i očekujemo da danas izaberemo predsjedavajućeg Općinskog vijeća Gračanica i da krenemo raditi za dobrobit svih građana“.

U nastavku sjednice, Puškar Hasan predsjednik Komisije za izbor, naglasio je da treba formirati komisiju u sastavu dva vijećnika i sekretar Vijeća koja će obaviti proceduru tajnog glasanja.

Aljić Adem:

„Smatram da je javno glasanje od izuzetne važnosti jer tajno glasanje podliježe manipulaciji. Kao i Izborni zakon takav kakav je podložan je manipulaciji koji je zavadio brata s bratom, komšiju s komšijom i predlažem da se obavi javno glasanje“.

Prešlo se na izjašnjavanje o prijedlogu da glasanje bude javno.

„ZA“ je glasalo 6 članova Općinskog vijeća, a ostali su suzdržani te je konstatovano da prijedlog nije dobio dovoljan broj glasova „ZA“.

Hasan Puškar, predsjednik Komisije je predložio da članovi Komisije za proceduru izbora predsjedavajućeg budu Ahmetović Halid, Sulejmanović Osman i sekretar Tukulj Dženana.

Prešlo se na glasanje.

Nakon obavljenog glasanja, predsjedavajući Edin Ibrišević konstatovao je da se u kutiji za glasanje nalazi 29 glasačkih listića.

Od toga je 6 nevažećih, odnosno nije se na njima glasalo, zatim 8 glasova je dobio Gadžić Rahim i 15 glasova Nihad Krajinović.

S obzirom da u prvom krugu ni jedan kandidat nije dobio dovoljan broj glasova, prešlo se na drugi krug glasanja.

Predsjedavajući Vijeća Edin Ibrišević je upoznao članove da ukoliko ni u drugom krugu ne prođe ni jedan kandidat ide se u treći krug. Ukoliko oba kandidata dobiju isti broj glasova, bira se kandidat koji je mlađi.

Prešlo se na glasanje u drugom krugu.

Nakon prebrojavanja glasova, Edin Ibrišević je konstatovao slijedeće:

6 glasačkih listića je nevažećih.

6 glasova je dobio Gadžić Rahim, a Nihad Krajinović je dobio 17 glasova, tako da je on novoizabrani predsjedavajući Općinskog vijeća Gračanica.

Predsjedavajući Vijeća Edin Ibrišević je čestitao novom predsjedavajućem i pozvao ga da se obrati Vijeću, te nastavi dalje vođenje sjednice.

Nihad Krajinović:

„Koristim priliku da vam se zahvalim na podršci današnjim glasanjem i da evo na početku iako se nisam pripremao za ovaj trenutak kratko kažem da ću kao novoizabrani predsjedavajući Općinskog vijeća Gračanica raditi prije svega u interesu građana, u skladu sa Zakonom i sve ono što Statut i Poslovnik o radu ovog tijela nalaže. Hvala još jednom.

Prije nego što pređemo na narednu tačku dnevnog reda dajem riječ Rahimu Gadžiću.

Rahim Gadžić:

„Evo koristim priliku da u svoje lično ime čestitam novoizabranom predsjedavajućem i ujedno da se zahvalim SDA koja me je predložila kao kandidata na mjesto predsjedavajućeg Općinskog vijeća Gračanica. Nadam se na uspješnom radu svih nas u narednom periodu“.

Dino Dedić:

„Ja želim u ime Kluba stranke za BiH da čestitam na izboru novom predsjedavajućem i da mu poželim puno sreće i uspjeha u radu. Još jednom čestitam“.

Mešić Fadil:

„Ispred Kluba SDU, BOSS, želim da čestitam novoizabranom predsjedavajućem Općinskog vijeća Gračanica, Nihadu Krajinoviću“.

Čamdžić Mirsad:

„U ime kluba Naša stranka i Demokratska fronta želim da kolegi Krajinoviću čestitam i poželim puno zdravlja, sreće i uspjeha na novom mjestu“.

Avdić Arnes:

„Ja želim novoizabranom predsjedavajućem sve najbolje u daljnjem radu, ispred Kluba BPS Sefer Halilović“.

Općinski načelnik Nusret Helić:

„Čestitam vijećnicima, a evo i ja koristim priliku da čestitam Nihadu na izboru za predsjedavajućeg Općinskog vijeća. Očekujem da ćemo sarađivati, što se tiče izvršne vlasti i predsjedavajućeg kao predsjedavajućeg Vijeća. I u prvom mom izlaganju sam rekao da zaista trebamo raditi u interesu građana ove općine. Projekte zajednički rješavati. Mi nemamo parlamentarne većine, evo javno da kažem, nema još, ali evo ovo je početak i dokazat će se sigurno da Gračanica može funkcionisati i bez parlamentarne većine, ako budemo svi iskreni, ako budemo aktivni, ako budemo sjedili i više se dogovarali oko projekata koji su kažem i ponavljam u interesu svih građana Općine Gračanica“.

Osman Sulejmanović:

„Evo i ja bih u ime Kluba SDP-a čestitao Nihadu na izboru i zatražio prije glasanja za kandidate za zamjenika predsjedavajućeg, pauzu“.

Data je pauza u trajanju od petnaest minuta.

Nakon pauze, nastavku sjednice je prisustvovalo 28 članova Vijeća. Sjednicu je opravdano napustio Mešić Fadil.

TAČKA 3 IZBOR ZAMJENIKA PREDSJEDAVAJUĆEG OPĆINSKOG VIJEĆA

Hasan Puškar:

„Za zamjenika predsjedavajućeg Općinskog vijeća Gračanica imamo predložena tri kandidata i to: Devedžić Almedin, Trepanić Mirela i Smajlović Vahidin. Znači tri su kandidata. Ukoliko ne bude nikakvih primjedbi možemo pozvati istu komisiju za proceduru glasanja“.

Za diskusiju se javio Smajlović Vahidin:

„Kolegama vijećnicima čestitam i želim puno sreće u radu. Kolegi Krajinoviću čestitam na izboru za predsjedavajućeg Općinskog vijeća Gračanica. Uzimajući u obzir principe demokratije i činjenicu da SDP je već dobila predsjedavajućeg i činjenicu da bi koncentracija da kažem tri čovjeka, jer je načelnik a i predsjedavajući Vijeća iz SDP-a i nebi bilo demokratski, ja ovom prilikom pred vama ovdje odustajem od kandidature za zamjenika predsjedavajućeg Općinskog vijeća. Na taj način dajem priliku kandidatu iz Naše stranke i SDA za izbor na ovu funkciju“.

Trepanić Mirela:

„Čestitam novoizabranom predsjedavajućem. Pozdrav kolegicama, voljela bih da ih je više ovdje u Vijeću. Čula sam da ih je ranije bilo deset. U Ruandi je 64 % žena u parlamentu, pa se nadam da će na slijedećim izborima biti bolje. Drago mi je da sam bila kandidaovana za zamjenika, ali mladom kolegi Demiru Milkiću i ovaj put željela bih se zahvaliti i voljela bih da u politici vidim manje kalkulacija, a više rješavanja građanskih problema, tako da ću olakšati ovaj izbor, pošto odustajem od ove kandidature i ovdje ćete vidjeti jednog zamjenika iz SDA. Čestitam i vama“.

Nihad Krajinović:

„Evo imamo situaciju gdje je od tri kandidata, dva su odustala i ostao je jedan, pitao bih vijećnike da se izjasnimo da li da glasamo tajno ili javno“.

Osman Sulejmanović:

„Obzirom da imamo jednog kandidata ja predlažem da se glasa javno“.

„ZA“ prijedlog je glasalo 26 članova Vijeća, a 2 člana su bila suzdržana.

Prešlo se na izjašnjavanje o kandidatu Devedžić Almedina za zamjenika predsjedavajućeg Općinskog vijeća Gračanica.

Kandidat je dobio 20 glasova, a ostali su suzdržani.

Krajinović Nihad je konstatovao da je za zamjenika predsjedavajućeg Općinskog vijeća izabran Almedin Devedžić i čestitao mu.

Vijeću se obratio Devedžić Almedin:

„Ovu priliku želim da iskoristim i nakon ovih rezultata glasanja da vam se zahvalim na podršci koju ste mi dali u obavljanju zamjenika predsjedavajućeg Općinskog vijeća. Nadam se

da ću u narednom periodu zajedno sa predsjedavajućim i ostalim vršiti dužnosti koje su predviđene Statutom i Poslovníkom o radu Općinskog vijeća i da ćemo svi zajedno raditi u interesu građana, da se više posvetimo rješavanju problema svih građana općine Gračanica. Hvala vam“.

Vijeću se obratio Sead Gazibegović, zamjenik predsjedavajućeg Općinskog vijeća ranijeg saziva:

„Evo ovim je i formalno prestao moj mandat zamjenika predsjedavajućeg. Svima sa kojima sam do sada saradivao u ova dva mandata počev od načelnika, opštinskih službi, kolega vijećnika koji su tu, ponovo izabrani, zahvaljujem se i nadam se da smo dobro saradivali. Novoizabranim vijećnicama i vijećnicima želim uspješan rad, naravno i ovim starim vijećnicima koji su tu. Hvala vam“.

Predsjedavajući Vijeća Krajinović Nihad je iskoristio priliku i zahvalio se dosadašnjem predsjedavajućem i zamjeniku predsjedavajućeg Općinskog vijeća, prije svega na radu kao i podršci i saradnji koju su pružali svima u predhodnom periodu.

Vijeću se kratko obratio i Fehratović Hasan, ministar u Vladi Tuzlanskog kantona:

„Hoću da se obratim kao neko ko dolazi iz ove sredine, neko ko je svojevremeno bio vijećnik i naravno u ime Vlade TK-a želim da čestitam na konstituisanju današnjeg Općinskog vijeća. Ovim se dakle stekli uslovi da u naredne četiri godine Općina Gračanica nastavi pravim putem, razvojem, a ja ono što mogu obećati i kazati u svoje ime, da stojim na raspolaganju. Stojim za saradnju i mislim da smo imali u ove nepune dvije godine koliko se nalazim na ovoj funkciji dobru saradnju, opet obećavam naglašavam da sam otvoren i Općinskom vijeću i Općinskom načelniku i privrednicima. Dakle, ono što sam i rekao i prije dvije godine. Hvala još jednom i srećan i uspješan rad“.

TAČKA 4

ODLUKA O PRISTUPANJU IZMJENAMA I DOPUNAMA STATUTA OPĆINE GRAČANICA.

Nije bilo učesnika u diskusiji i odluka o pristupanju izradi Odluke o izmjenama Statuta Općine Gračanica je usvojena jednoglasno sa 28 glasova „ZA“ koliko je i bilo prisutno vijećnika u sali“.

Sjednica je završena u 15⁴⁵ sati.

ZAPISNIK VODILA:

Mevlida Naimkadić

**PREDSJEDAVALJUĆI
OPĆINSKOG VIJEĆA
Nihad Krajinović**

